

Taitos

na letama

Pol na waikaiwama

1 Kapore Taitos,
¹ Taugu Pol, Mamaitua na taunoyama be Yesu Keriso na apasolma. Bada taugu ya vineguna da Mamaitua na vinevinema, banegidima yà sagudi da adi waisumağama èi rewa panana. Be mate riukaua yài katakataidi da taudi Mamaitua na goane ta miana. ² Inam waisumeğine tauda tè kataiena da tokare yawasana kenakena nonoğinama tà pağona, vutuna Mamaitua boni ya sausağena, muriğa da yaba matabuna yai tubuğidina. Be Mamaitua nam airağan e kaiyovueda. ³ Be rağan boruborune tauna inam varinama yai mağatarina. Be Mamaitua tauwai yawasanidama ya vineguna da taugu inam varinama banaga ġarodie yà rauguguyena.

⁴ Tam Taitos ġarome uma letanama yà girugirumina. Am waisumağe tam taugu natuğomiguma. Tamadama Mamaitua be tauwai yawasanidama Yesu Keriso adi raukiviverema be adi subama ġarome ta kenana.

Taitos Kret nopone ekalesia babadidima e vinedina

⁵ Tam Kret bonabonane è gosemna, baninama dà noyama kwa kaiğavutinama aubainama, tam meagai da meagai nopodiğa kwa nağo be ekalesia adi babadama kwa vinedina. ⁶ Be ekalesia debanama tauwai badenama tauna sibo tauğoma, be tauna na yawasanama sibo umanama:

- Tauna yawasana didimanine e mia be nam aba e voia waigewa da banaga tai giugie.
- Be tauna waivi tenağa e naği be vutunağa e rabena.
- Be na sedama sibo waisumeğidima be nam beapotepotedi be rawarawa ġaiğaidi.

⁷ Be mate ekalesia debanama tauwai badenama tauna Mamaitua noya ya utena aubainama umanama yawasanidie sibo ya miana.

- Tauna yawasana didimanine e miana, be nam aba sibo ya voia waigewa da banaga ai giugiue.
- Be tauna nam e kawa saḡe munaḡe be banaga matedie e rauguyaguyau,
- be nam meditulo banegina,
- be nam tegobua banegina,
- be nam sorukeakea banegina,
- be nam kaiyovue e rarau mane bo e rarau purapura.
- ⁸Be banaga na vadae ta tavatavana taurabe kaudima.
- Be tauna yawasana veredima tauḡoedima.
- Be inam baneginama tauna miamia genuaninama, be nam voivoia yabayababina,
- be tauna na noḡotama matabudi didimanidiḡa,
- be tauna Mamaitua na ḡoane nama e mianana,
- be na yawasanae tauname e rabe munaḡena.
- ⁹Ekalesia debanama tauwai badenama tauna Mamaitua riunama awai katakataina, vutudi e kaidididi da bagibaginaḡa. Inam raḡanine tauna tokare teneginama da inam waikatakataidie sibo banaga ḡesaudima mate yai katakataidi be ya riutuḡaiedina. Be riukaua tauriutuḡaiedina banegidima, dabudi ta kita be ta kataie da taudi inam ta kaikaiyovuna.

¹⁰Baninama banaga toitoi riukaua tauriutuḡaiedina be tauboru waideḡa banegidima ta miamiana. Inam kaua Jius banegidima adi voia ḡomama nama, taudi ta riuriuna da banaga tarawatu tai muriwatanena, yodibe yawasana ta paḡona. Be inam giudima matabudi kaiyovu. ¹¹Inam banegidima kwa riutuḡaiedina, baninama taudi adi waikatakataima kaikaiyovune dam toitoi adi waisumaḡama ta kawakawa gewegewedina. Inam tauwai katakatai kaikaiyovudima maneḡa tawai matanedina. ¹²Boni nuauyauya baneginama tenaḡa Kret nopone tauna umanama ya riuna, “Kret banegidima taudi matabudi kaikaiyovudima, kivikorokorodima, matagayagayawidima be kaniposa banegidima.” ¹³Inam riukaua. Vutuna aubainama kwa riutuḡai vavasḡedi be kwa voiedi da adi waisumaḡama Bada ḡarone ei rewapanana, ¹⁴be nam Jius adi giuna kaikaiyovudima bo adi tarawatuma tai beavaiedi. Be banaga aitaḡa riukaua taumia tautaurienama nam adi giuna ta vaiedi be tai muriwatanedi.

¹⁵Aitaḡa nopodie nam mira, taudi ḡarodie yaba matabudi nam miremiredi. Be aitaḡa nopodie mira be nam timawai sumaḡana, taudi ḡarodie yaba matabudi miremiredima, baninama taudi nopodima be adi noḡotama a mirana. ¹⁶Taudi ta riuriuna da Mamaitua kabe ti katakataie, be adi yawasana ewai maḡataridina da taudi Mamaitua nam ti kataiena. Taudi rawaḡaiḡai banegidima be banaga tawai

mataravuḡeidina. Taudi nam tokare aiyaba verenama ta voie be teneteneḡina, ibewa ḡoma.

Waikatakatai verenama animia kaua aubainama

2 ¹Waikatakatai verenama ruvane, nama banaga kwai katakataidina. ²Tautauḡoma poredima kwai katakataidi da taudi sibo a mia genuanana be nam a voia yabayababa. Be taudi banaga viviviredima sibo a mia be taudime a rabe munaḡedina. Be adi waisumaḡama sibo yai rewapana be nopodima wainuapaḡo ya moḡavuna, be pipiriri raḡandie nuedima sibo a taibagina.

³Be kauinama teneginama waiwaivi poredima nama kwai katakataidi da taudi sibo viviviredima a miana, Bada na tauwai muriwatanama maika. Be taudi nam sibo awai mena be nam sibo a tegotego bua, inam avedi. Be taudi waikatakatai veredima sibo a voivoiedina. ⁴Uma waiwaividima poredima taudi sibo waiwaivi vaudima ai katakataidi da taudi sibo adi tautauḡomama be adi sedama ai nuapaḡoedina, ⁵be mate taudime sibo a rabe kauedi be nam tautauḡoma ḡesaudima mate ai naḡo dobira. Be mate adi vadae sibo ai rabaraba kauana. Raḡan matabuna kividima sibo a vere, be adi tautauḡomama adi waibadama dibune sibo a miana. Inam kauine banaga tokare Mamaitua riunama nam tai kwatekwateve.

⁶Be kauinama teneginama yarayaraga kwai katakatai yaḡedi da taudime sibo a rabe kauedina. ⁷Be tam yawasana veredima kwa voiedi da taudi dabudine ta kita be tai muriwatanemna. Waikatakataidima raḡanine, tam didimanae be riukaue kwai katakataina, be bonama ei rewapanana nam kwai digidigriedi. ⁸Be am waikatakataima sibo ya didimana be ya vere vavasagana. Inam raḡanine banaga tokare nam teneteneḡina da ta riu tuatuaḡaiem. Be tauriu tuatuaḡaiema tokare ta tunimayaḡana, baninama taudi nam aba gewagewanama ḡarome ti vaiena da ta giue.

⁹Taunoya yababa kwai katakataidi da yaba matabuna ḡarone adi babadama adi waibadama dibune sibo a miana. Be taudi a raurubu da adi babadama sibo a kawa nuaveredina, be nam ḡarodie a riu viravira. ¹⁰Be taudi nam adi babadama ḡarodie sibo a danedanene, avedi. Be taudi adi yawasanae adi babadama sibo a kitedi be a kataiedi da taudi naumeki taunoya patututudima. Inam kauine tokare Mamaitua tauwai yawasanidama riunama banaga nuedima e soruna.

¹¹Mamaitua na raukiviverema kaite ya maḡatarana banaga matabudi ḡarodie. Be inam raukiviverene banaga tokare yawasana ta paḡona. ¹²⁻¹³Inam kedane Bada e riuriuedana da gewagewa be dobu adi wainuaverema nam sibo t̄ei muriwatanedi avedi, be didimanae ta mia be ta rabe munaḡedana. Be Yesu Keriso, tauna vutuna Mamaitua

dosinama be tauwai yawasanidama tà raberabena maika, tauda uma dobune Mamaitua na ġoane nama tà miana. Tauda tè kataiena da tauna ma borumina be ma neneġarina e maġatarana. ¹⁴Tauna vutuna na yawasama yai uta munaġena tauda aubaidama, be dà gewegewae ya kuvesida be nopodama ya koġa porena. Inam kedane tauda yodi tauna na banaga ġomama tè tubuġana, aubainama tauda vere voiedima tà ġoġoe kaudina.

¹⁵Inam giudima vutudi banaga kwai katakataidi be kwa duġudina. Be deġoda aitu gewegewae e naġonaġona, tauna kwa riutuġaiena, baninama tam rewapana ġarome. Be nam aitu e kita waiyovoġem.

Vere ko voie

3 ¹Banaga kwa riu wainoġotidi da waibabada be gabeman adi waibadae sibo a mia be a voteyeteyedina. Be taudi raġan matabuna sibo yaba verediġa a voivoiedina. ²Be taudi nam aitu ġarone sibo awai mena bo nam awai kawa ġasiġasi, avedi. Be taudi adi banagama mate sibo a voyaġota be ai turana kauana.

³Tauda mate boni bua na miane tè miamiana. Inam raġanine tauda Mamaitua tè rawarawa ġaiġaie be banaga awai kedadoka waigewadana. Be tauda dobu be tubuġa adi ġoane tèwai yaragana. Be dà yawasama gewegewedima maika unura be waikawa gadogai nopodama ya moġavuna. ⁴Be Mamaitua tauwai yawasanidama na raukiviverema, be na wainuapaġoma ya maġatarana raġanine, ⁵tauna yai yawasanidana. Inam nam dà verema aubainama i yawasanidana, ibewa da na raunuatoie yai yawasanidana. Mamaitua dà gewegewama ya koġa porena raġanine, tauda tè tubuġa vitara be Arua Babaue yawasana vaunama ya utedana. ⁶Baninama Yesu Keriso tauwai yawasanidama aubaidama ya gurina aubainama, tauna Arua Babau debade ya ġini porena. ⁷Tauna na raunuatoie ya kawa didimanidana, aubainama yodi tè kataiena da tauda tokare yawasana kenakena nonoġinama tà paġona. ⁸Uma giudima ya riuriuemna, inam matabudi riukaua. Be taugu yà ġoġoena da inam giudima kwa giu guratana aituġa Mamaitua tawai sumaġena ġarodie, yodibe taudi ta kita kaua da raġan matabuna yaba verediġa ta voiedina. Inam yabedima veredima vutudi tokare banaga ta sagudina.

⁹Be banaga giu buebuedima debedie tawai saġasaġana, nam kwai beavaiedi. Be mate aituġa kimta poredima ġarodie yawasana ta kerikeri wanedi be Mousis na tarawatuma mate debedie tawai kawa riuriuna, nam kwai beavaiedi. Inam giudima nam banibiribiridi, be giudima tokare nam aitu ta sagu. ¹⁰Be banaga aitu da ekalesia e daridariġena, inam baneginama raġan tenaġa bo rabui nama kwa riutuġaiena. Be deġoda e raukosogaiġaina, naumeki da kwa kita yababena, be nam mate koi popo. ¹¹Tam kuya kataiena da inam nama banegidima taudi gewagewa

da gewagewa nopodima ya moḡavuna, vutuna aubainama taudime adi gewagewama ewai maḡatarana da taudi gewagewa banegidima.

Pol na giuma damonama

¹²Raḡanine taugu Atemas bo Taikikas yà riuporena ḡarome, kwa raurubu da Nikopolasma ḡarogue kwa tavana, baninama yau ogama è taraḡina da bodubodue taugu inam dabudine yà miana.

¹³Kwa kita da tarawatu kana badama Senas be Apolas adi ḡoanama matabuna kwa sagudina vaḡai aubainama. ¹⁴Tauda dà banagama aitaḡa waisumegidima, taudi nam sibo a mia yabayababa. Taudi vere sibo voiedima a kataie da banaga waikaruwaḡewaḡedima sibo a sagusagudina.

¹⁵Banaga uma dabudine ka miamiana, matabudi tam tawai kaiwemna. Be inam dabudi aitaḡa waisumaḡe tawai nuapaḡoemaina, kwa riuedina tauma kawai kaiwedina.

Mamaitua na raukiviverema matabumi ḡaromie.